

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON /KANTON SREDIŠNJA BOSNA
OPĆINSKI SUD U BUGOJNU
Broj: 46 0 K 116151 24 Kps
Bugojno, 03.07.2024. godine

U IME FEDERACIJE BOSNE I HERCEGOVINE !

Općinski sud u Bugojnu, sudija Aldina Rebihić Topoljak, uz sudjelovanje zapisničara Ivane Jezidžić, u krivičnom predmetu protiv optuženog S.Đ., zbog krivičnog djela Nasilje u porodici iz člana 222. stav 3. u vezi sa stavom 1. Krivičnog zakona Federacije BiH za koje ga je optužilo Kantonalno tužilaštvo Srednjobosanskog kantona optužnicom broj: T06 0 KT 0034181 23 od dana 29.12.2023. godine, nakon održanog ročišta za saslušanje optuženog dana 03.07.2024. godine u prisutnosti optuženog i kantonalnog tužitelja Sulejmana Selimović, donio je i istog dana javno objavio:

P R E S U D U

OPTUŽENI: S.Đ., sin A. i majke N. rođene F., rođen ... u B., nastanjen u mjestu ..., općina B., državljanin BiH, JMB: ..., pismen, završena Osnovna škola, po zanimanju radnik, oženjen, otac dvoje djece, nezaposlen, lošeg imovnog stanja, neosuđivan.

K R I V J E

Što je:

Dana 06.11.2023.godine, oko 17,30 sati u mjestu ..., općina B., nakon što se doveo u alkoholizirano stanje, vršio fizičko nasilje prema svom ocu A.Đ., na način da je istog fizički napao tako što mu je upotrebom hladnog oružja (noža "Dandir") nanio povrede u predjelu lijeve noge (potkoljenice), svjestan da ovakvim drskim i bezobzirnim ponašanjem i nasiljem ugrožava mir i tjelesnu cjelovitost člana porodice, što je i htio, kojom prilikom je oštećenom A.Đ. nanio lake tjelesne povrede u vidu posjekotine dužine oko 7 cm,

dakle, opasnim oruđem ugrozio mir i tjelesnu cjelovitost člana porodice.

čime je počinio krivično djelo Nasilje u porodici iz člana 222. stav 3. u vezi sa stavom 1. Krivičnog zakona Federacije BiH.

pa mu sud na osnovu navedenog zakonskog propisa, te primjenom odredbi člana 43., 49. i 62 Krivičnog zakona Federacije BiH i člana 353. stav 2. u vezi sa članom 354. stav 1. i 2. Zakona o krivičnom postupku Federacije BiH izdaje:

K A Z N E N I N A L O G

Kojim se optuženom S.Đ. izriče:

U V J E T N A O S U D A

na način da mu se za počinjeno krivično djelo utvrđuje kazna zatvora u trajanju od 8 (osam) mjeseci i istovremeno određuje da se utvrđena kazna neće izvršiti ukoliko optuženi u vremenu provjeravanja od 1(jedne) godine od dana pravosnažnosti ove presude ne počini novo krivično djelo.

Na osnovu člana 78. Krivičnog zakona Federacije BiH optuženom se izriče sigurnosna mjera oduzimanja predmeta koji su na bilo koji način, u cjelini ili djelimično, upotrebljeni ili su bili namijenjeni da budu upotrebljeni za učinjenje krivičnog djela ili koji su nastali učinjenjem krivičnog djela i to: jednog noža dužine 28 cm, dužina sječiva 15 cm sa crnom pvc drškom dužine 13 cm sa natpisom sa jedne strane DANDRIR, a sa druge strane MADE IN CZESHLOVAKIA, koji će se nakon pravosnažnosti ove presude uništiti.

Na osnovu odredaba člana 202. stav 1. Zakona o krivičnom postupku Federacije BIH optuženi se obvezuje nadoknaditi troškove krivičnog postupka u iznosu 50,00(pedeset) KM, a koji se odnose na sudski paušal u roku od 30 dana od dana pravosnažnosti presude.

O b r a z l o ž e n j e

Kantonalno tužilaštvo Srednjobosanskog kantona optužnicom broj T06 0 KT 0034181 23 od dana 29.12.2023. godine optužilo je pred ovim sudom S.Đ. iz ... zbog krivičnog djela Nasilje u porodici iz člana 222. stav 3. u vezi stavom 1. Krivičnog zakona Federacije BiH sa zahtjevom da sud izda kazneni nalog kojim se optuženom izriče uvjetna osuda, te utvrđuje kazna zatvora u trajanju od osam mjeseci sa rokom provjere od jedne godine te da se optuženi obveže na plaćanje troškova krivičnom postupka.

Postupajući po predmetnoj optužnici sudija za prethodno saslušanje ovog suda se složio sa izdavanjem kaznenog naloga, te je potvrdio optužnicu dana 22.05.2024.godine i zakazao saslušanje optuženog.

Optuženom je dana 29.05.2024.godine uručena potvrđena optužnica, te je optuženi poučen da protiv optužnice može uložiti prethodni prigovore i izvršiti uvid u spis.

Na ročištu održanog u ovom sudu dana 03.07.2024.godine radi izjašnjenja optuženog o krivici utvrđeno je da je ispoštovano pravo optuženog na odbranu odnosno da ga zastupa branitelj, te isti nije uzeo branitelja, izjavivši da se želi braniti sam, a također je izjavio da ne želi ulagati prethodne prigovore na potvrđenu optužnicu.

Saslušanjem optuženog sud je utvrdio da je optuženi razumio optužnicu, te zahtjev tužitelja za izdavanje kaznenog naloga i izricanje uvjetne osude koja je predložena u kaznenom nalogu, kao i dužnosti plaćanja troškova kaznenog postupka, te da ne namjerava ulagati prethodne prigovore povodom potvrđene optužnice, nakon čega je tužitelj iznio navode optužbe i predočio dokaze koji su protiv optuženog prikupljeni u istražnom postupku i to: Zapisnik o uviđaju PS Bugojno, broj: 02/4-3-1-04-2-20-A/23 od 007.11.2023.godine;Izvjješće o kriminalističko tehničkoj pretrazi lica mjesta događaja, PS Bugojno, broj: 02/4-3-1-04-2-EO:45/23 od 06.11.2023.godine;Rješenje Općinskog suda Bugojno, broj: 46 0 Pr 11560 23 Zm od 06.12.2023.godine, Nalaz i mišljenje ljekara specijaliste za A.Đ., JU Opća bolnica Bugojno od 06.11.2023.godine;Alkotest na ime S.Đ. od 06.11.2023.godine;Bijela koverta sa privremeno oduzetim predmetima;Fotodokumentacija, PU Bugojno, broj: 02/4-3-1-04-2-

EO:45/23 od 27.11.2023.godine;Izvod iz kaznene evidencije za osumnjičenog S.Đ., PS Bugojno, broj: 02/4-3-04-2-1-289/23 od 07.11.2023.godine, Službena zabilješka, PS Bugojno, broj: 02/4-3-1609/23 od 06.11.2023.godine;Naredba za dostavljanje privremeno oduzetih predmeta, Općinski sud u Bugojno, broj: 46 0 K 11518 23 Kpp od 13.11.2023.godine;Zapisnik o saslušanju svjedoka E.Đ., PS Bugojno, broj: 02/4-3-1-04-2-575/23 od 07.11.2023.godine;Zapisnik o saslušanju svjedoka A.Đ. PU Bugojno, broj: 02/4-2-176/23 od 07.11.2023.godine;Zapisnik o saslušanju svjedoka S.H., PS Bugojno, broj: 02/4-3-1-04-2-577/23 od 07.11.2023.godine;Zapisnik o saslušanju svjedoka A.H., PS Bugojno, broj: 02/4-3-1-04-2-576/23 od 07.11.2023.godine i Zapisnik o ispitivanju osumnjičenog S.Đ., PS Bugojno, broj:02/4-3-1-04-2-574/23 od 07.11.2021.godine, a na koje dokaze optuženi nije imao primjedbi.

Na poziv optuženom da se izjasni o krivnji, optuženi je izjavio da je kriv, da nema primjedbi na krivično pravnu sankciju-uvjetnu osudu predloženu od strane tužitelja i da prihvata izdavanje kaznenog naloga u skladu sa optužnicom, te kako nije imao primjedbi na dokaza predložene od strane tužitelja, nakon čega je tužitelj naprijed navedene dokaze uložio u spis predmeta.

Polazeći od upravo navedenog, sud će u nastavku presude u skladu sa odredbom člana 354. stav 2. Zakona o krivičnom postupku Federacije BiH, ukratko iznijeti razloge koji opravdavaju njezino donošenje.

Dakle, optuženi S.Đ. u potpunosti je priznao izvršenje krivičnog Nasilje u porodici iz člana 222. stav 3. u vezi sa stavom 1. Krivičnog zakona Federacije BiH, a takvo njegovo priznanje potvrđuju i dokazi koje je tužilac priložio uz navedenu optužnicu, to iskaz oštećenog A.Đ. dat na Zapisnik o saslušanju svjedoka PU Bugojno, broj: 02/4-2-176/23 od 07.11.2023.godine na osnovu kojeg je sud utvrdio da je od strane optuženog S.Đ. došlo do ispoljavanja nasilja prema njegovom ocu A.Đ. na način kako je to pobliže činjenično opisano u izreci ovog rješenja. Prema iskazu svjedoka A.Đ. , proizlazi da je se dana 06.11.2023. godine u popodnevnim satima nalazio na parceli u blizini svoje kuće gdje je kosi pšenicu kada je pred mrak do njega došla supruga N., te zatražila od njega da doveze traktor i sina S. kući što je i uradio, otišavši do trgovine..., gdje je zatekao svog sina S.Đ. i još pet osoba kako konzumiraju pivo. Tom prilikom je S.Đ. rekao da će otjerati traktor kući, a da on pošto je puno pijan uzme taksu, te se istim doveze kući. Po dolasku kući traktor je parkirao u garažu i zaključao a ubrzo za njim stigao je i njegov zet koje je dovezao sina S.Đ. kao i biciklo. Prema daljim navodima svjedoka A.Đ., S.Đ. je odmah otišao do garaže s namjerom opet izaći sa traktorom, pa kada je vidio da je garaža zaključana u ljutnji mu je rako da će traktor zapaliti na dvorištu da izgori. Nedugo potom, S.Đ. je zašao iz kuće, uzeo motornu pili ispod stepenica i krenuo u pravcu garaže s namjerom da odvali katanac kojim je zaključana garaža i uzme traktor. Kada je ispred garaže počeo paliti motorku svjedok A.Đ. mu je prišao s leđa sa namjerom da mu istu otme, pri čemu im je pritrčao njegov zet te u namjeri da spriječi S.Đ. da udari svjedoka A.Đ. istog odgurnuo, pri čemu je S.Đ. pao na zemlju. Prilikom ustajanja S.Đ. ga je uspio posjeći po nozi, gdje mu je u ruci vidio nož, pa ga svjedok vez ponovno odgurnuo, uslijed čega je S.Đ. pao potrbuške, uslijed čega su mu uspjeli izvaditi nož iz ruke i svezati ga konopcem do dolaska policije. Prethodno izneseni navodi svjedoka A.Đ., potvrđeni su Nalazom JU Doma zdravlja Bugojno od 06.11.2023. godine u kojem je utvrđeno da se na liječnički pregled javio zbog posjekotine dužine od 7 cm u predjelu stražnje strane lijeve potkoljenice zadobijene nožem.

Osim predmetnim nalazim, iskaz oštećenika A.Đ. potvrđen je iskazima ostalih svjedoka i to: A.H. dat na zapisnik o saslušanju svjedoka A.H., PS Bugojno, broj: 02/4-3-1-04-2-576/23 od

07.11.2023.godine, koji je u pogledu kritičnog iznio pred ovlaštenim službenim osobama, te u okviru kojeg, između ostalog u bitnom izjavio kako mu je poznato da je do napada S.Đ. na njegovog oca A.Đ. došlo iz razloga što je A.Đ. branio S.Đ. korištenje traktora kojim se S.Đ. prethodno dovezao pred neku trgovinu gdje je konzumirao alkohol. I ovaj svjedok je potvrdio da je po dolasku kući najprije došlo do verbalne rasprave A.Đ. i njegovog sina S.Đ., koji je u jednom trenutku upalio motornu pilu, na šta mu je A.Đ. govorio da je ostavi i da ne dira traktor, da bi ga nakon toga S.Đ. fizički napao, te nožem nasrnuo prema A.Đ. i istog ozlijedio u predjelu noge.

Ni optuženi S.Đ. svojim iskazom kojeg je dao na Zapisnik o ispitivanju osumnjičenog PS Bugojno, broj:02/4-3-1-04-2-574/23 od 07.11.2021.godine nije negirao prethodno iznesene navode svjedok, nego je izjavio da se ničeg ne sjeća.

Također, iz rješenje Općinskog suda Bugojno broj: 46 0 Pr 11560 23 Zm od 06.12.2023.godine proizlazi da je optuženom izrečena zaštitna mjera zabrana približavanja žrtvi nasilja A.Đ. na udaljenosti od 100 metara u trajanju od šest mjeseci dana počev od dana prijema rješenja zbog toga što je dana 06.11.2023. godina oko 17:25 sati u mjestu ... u dvorištu kuće u kojoj stanuje zajedno sa roditeljima, prethodno se doveo u alkoholiziranom stanje, te fizički nasrnuo na oca A.Đ. tako što je, upotrebom hladnog oružja (noža) istom nanio povredu u predjelu lijeve noge (potkoljenice) koji radnjama je počinio nasilja iz člana 7. stav 1. tačka 4. Zakona o zaštiti od nasilja u porodici Federacije BiH.

Imajući u vidu ove činjenice kao i to da je optuženi prihvatio izricanje krivične sankcije predložene u optužnici, to je odlučeno kao u izreci ove presude.

Prilikom izricanja uslovne osude sud je utvrdio da su kako njena vrta i visina, u konkretnom slučaju srazmjerni težini učinjenog krivino djela i stepenu društvene opasnosti optuženog kao njegovog učinioca. S tim u vezi sud je uzeo u obzir da je optuženi porodičan čovjek, otac dvoje djece, da je nezaposlen i lošeg imovnog stanja, koji nije osuđivan za krivična djela, što znači da se radi o licu koje do sada nije bilo sklono vršenju krivičnih djela. Imajući to u vidu, izrečenom kaznom-uvjetnom osudom kojom je utvrđena kazna zatvora u trajanju od osam mjeseci i sa rokom provjere od jedne godine, kako je to bilo predloženo i od strane Kantonalnog tužiteljstva, ostvarit će se, po mišljenju ovog suda, kako opća svrha kažnjavanja, koja će utjecati na optuženo da ponovi ne čini isto ili slično krivično djelo, tako i generalna svrha koja će uticati i na druga lica kao potencijalne učinioce ovakvog krivičnog djela.

Na osnovu člana 78. Krivičnog zakona Federacije BiH optuženom je izričena sigurnosna mjera oduzimanja predmeta koji su na bilo koji način, u cjelini ili djelimično, upotrebljeni ili su bili namijenjeni da budu upotrebljeni za učinjenje krivičnog djela ili koji su nastali učinjenjem krivičnog djela i to:jednog noža dužine 28 cm, dužina sječiva 15 cm sa crnom pvc drškom dužine 13 cm sa natpisom sa jedne strane DANDRIR, a sa druge strane MADE IN CZESHLOVAKIA, koji će se nakon provasnažnosti ove presude uništiti.

Oglasivši krivim za navedne krivično djelo sud je optuženog na osnovu člana 199. i 202. stav 1. Zakona o krivičnom postupku Federacije BiH obavezao da nadoknadi troškove krivičnog postupka u iznosu od 50,00 (pedeset)KM koji se odnose na sudski paušal, u roku od 30 (trideset) dana od dana pravosnažnosti ove presude. Odmjeravajući ovaj iznos sud je imao u vidu trajanje i složenost postupka kao i lične imovinske prilike optuženog,

smatrajući da je odmjerani iznos troškova iznos koji će optuženi moći platiti i da njihovim plaćenem neće biti dovedeno u pitanje njegovo izdržavanje.

Kako je oštećeni A.Đ. izjavio da ne postavlja imovinsko pravni zahtjev to sud o istom nije niti odlučivao.

ZAPISNIČAR

SUDIJA

Ivana Jezidžić

Aldina Rebihić Topoljak

POUKA O PRAVNOM LIJEKU:

Protiv ove presude stranke mogu izjaviti žalba Kantonalnom sudu u Novom Travniku u roku od 8 dana od dana dostavljanja ove presude. Žalba se predaje putem ovog suda u dovoljnom broju primjeraka za sud i protivnu stranku.